

ጴጥሮስ ከተሶሃ ዋነ ሶህኑተ ኣጉስ

ዋነ ሶቀማንቸ ጴጥሮሴ ሶህኑት ከተበንቶኢሁ ሶህኖስ ኣዜን «መገኑ መጠሮ ኡመቲሃ» የመም ገአመኖለከ ቀዋ እስይ ቅልብ እዲን ብንይቶ አመዕናኖታት፤ ሶህኖስ ቡዕለ እኮ ጠዉ አመዕነትስ መሳን ሸረሙለከ ኦርሸት ኢልቶሲ አመዕናኑተ ጠረኝሲሃት፤ ከተሶሲሁ ህካን እዕዮሁ ሬሁስ፤ ሬሆች ኬኡስለከ ፈንቀል አሜትስ ተብሳሃ ኩለኖ፤ መሲህ ኢስ ተሸት ላገተ እነበባህኡት ቃግሲሃት፤ መሲህ ኢስ ሄዕዮ ሃል ምሳልተ እዕይ ኦሪሸት አታዕሊን ቶጉ ሀስሰኖገ ቃግሰኖ፤ ህከኒንን በርግ ኦሪሸት አመዕነትስ ጠረኝመተ ፊተንታኢሃ እሁስ «መሲህ ኢስ ለለኖ በር» ሀስሰኖ ወጥስ ደእታኢሃ እሁስ ቃግሰኖስ፤

ከተሶሲሁ ኦሪሻን አታዕልቶተ ጠረኝሰኖሀኒች በትሽ እነበባእሩ መሲህ አዋንታሰሩ ሄኡ ሀስሰኖስ ሃሊን ሄኡተ ቃግሰኖስ።

መጻፉስ አፎሃ

ኣጉስ (1፡1-2)

መገኑ ጡምሳንቹ እሁስ ቃግሰኖ ጠወ (1፡3-12)

ጠሊለ ሄኡ ሄኦኖተ ኣስንቶ ሸዘነተ (1፡13—2፡10)

ኦርሸ ወክት አመዕናኑት አኡ ሀስሰኖስ ጠወ (2፡11—4፡19)

አመዕናኖ ገዉ ሆፍሱለከ ክድመተ (5፡1-11)

መጨረሻስ (5፡12-14)

1-2 መሲህ ኢስ አሳቤቹ እኮም ጴጥሮሴች አኑ መገኑ ሄጭ ደግንከስ መጠሮህዕኔሀኡተ፡ መሲህ ኢሲሃ እዘዘንቶኖተለከ ቄጊንከስ ሄበ መራጨ አኤናን ነጠ እኮኖተ ጠሊለ አያኒን አደ እኬንተሀኡሃ ጳንጦሲያን፡ ገላትያን፡ ቀጳዶቅያን፡ እስይ ባዶንለከ ቢታን ባዶን ኮሀ እኬን ብንይቱን ሄኤንንተሀኡት ጉዕሚንከክዕኔ ሶህንቶአተ ሶህኑ፤

ክዕኔንከ መገን ኣስቱትለከ ወገሬቱ በተኡንክዕኔ።

ሄኦኖ ተብሳሃ

3 መሲህ ኢስ ሬሆች ኬእ መሳን ሄኦኖ ተብሳ ኣሴኔሁ አበ አሙዚን ሊንክ ሃዕሮ እለንሸ ኣሴኔ ቀርቹሃኔ መሲህ ኢስ አኑ መገኑ ገለትጨሙን።

4 እሱን በእቡ፥ ሽምቡለከ ባልቅቡ እርሱት ሰማን ቅጥኦዕዮህዕኔ።

5 አዕኑ ጎፍሜ በር ለለኖ ጡሚሃ አመዕነት መሳን መገን ዎልቃን አገረንቴንታኦ።

6 ህካን እኮቤቺሃ ቀዎ ወክቲሃ አደደ ፊተነ ኣዜን ህጉክዕኔ ሻዝሰኖሃለከ ፈቅባሃ እኮጎሬሁ ጡሞንከክዕኔ ተሽ ዩንክዕኔ።

7 ሁኩ ፊተነት ኢልታህዕኔሁ አመዕነቱክዕኔ ህንቅ እሁሰ አጥራመትሃት፤ በአኖ ወርቁ ገራን ፊተነመኖ፤ ህንቅ አመዕነቱክዕኔ በአኖ ወርቁት በትሽ ዋጉ ዮሲሁ ህት ፊተነሙ ሀሰሰኖሰ፤ ሁኩ ህንቅ አመዕነቱክዕኔ መሲህ ኢሰ ፈንቀል አሜተኖ ወክት ገለት፥ ኬዕምኣለከ ናዱ ደግሲሰኖህዕኔ።

8 መሲህ ኢሰ ለኤንበጎሬሁ ኢትቴነንተሰ፤ ቲሁ መሃ እሱ ለኤንበጎሬሁ እሱን አመዕነቱንታኦ፤ ላጋን ኩሌን አታሌንበለከ ከበጀሞ ተሽቲን ተሽ ዮኖህዕኔ።

9 መሰንትሰ አመዕነትክዕኔ ጎፍሞሃ እኮ ነብሴክዕኔ ጡሙ ደዕቴንተቤቺሃት።

10 ህካን እኮቤቺሃ ጡምተኔሃ ክዕኔሃ እሀኖ ኣሰቱተ ራጎ ነብያከት አበ መረመርቶኡ።

11 እሱን ኣዜንከሰ ሄዕዮ መሲህ አያኑ መሲሁ አሌን ኢልታ ኦርሸተለከ ኦርሻቶ ኤተርን አሜተኖ ኬዕምኣተኔሃ ሄጭ ለልሸ እቅ፤ እሱን ሁኩን ጉዕመንኩ መ ወክትለከ ሀት እክ እሀኖጎሬ መረመርቶ እቅ።

12 ከን ጠውተኔሃ ነብያከት ካደንታ እቂሁ ክዕኔታት ቤሉ ገዉሰ እሁ ሆጉሰ ለልዮሰ፤ ከ ጠወ ክዕኔሃ ዱዱብሰቶኢሁ እንጂለ ክዕኔሃ ኤሶ መናከት ሰሜቶ ሶህሞ ጠሊለ አያኒንት።

ጠሊለ እሂን ሄዕተኔሃ

13 ህካን እኮቤቺሃ ቀልብክዕኔ ኬሴን ሆጎተ ቅጥ ይዬ፤ መሲህ ኢሰ ፈንቀል አሜተኖ ወክት ደኣቴነንተ መገን ኣሰቱተ ዊመ ቀልቢን ተብሳሃ አዕዬ።

14 ትዛዝ ቶጋ እለገ እኬን ደጉ ሆጊን ዎዕነ ዮህዕኔ ሂለ ሄዕላቸተ አዎንቶኖቺ።

15 ጠዉ እኮጎሬ ገኤህዕኔ መገኑ ጠሊለ እኮገን አዕኑሁ ሄኦንከክዕኔ ጉዕማንን ጠሊላኑተ እኬ።

16 መሰንትሰ «እን ጠሊለ እኮምቤቺሃ አዕኑሁ ጠሊላኑተ እኬ» የመሞ ከተበሞኡ።

17 አይሃ ጎሎዕናን ጉዕሚንከሰ ሆጎሰገ ፈረደኖ መገኑ «ኒ አነ» ይቴን ገእቴነንታሃ እኮች ከን ኣዱንያ አሌን ኮህ እኬን ዮንተ ጌሳን መገኑ ዋጅቴንን ሄዕዬ።

18 አዕኑ አናካችክዕኔ ረገኤንተ ተሰ ሄኢች ወዘንቴንታሁ በአኖ ብሪን ህከረንገ ዋርቂን እሁ ሆጉሰ ደጌነንተ።

19 አዕኑ ወዘንቴንታሁ ጤዕየት ህከረንገ ኩሌኖሰርቹ ዮበእ ነጠ ሆልቹ እኮ መሲህ ኬዕምኝ ቁጊኒት።

20 እሰ ለሌኢሁ ኣዱንያ አሉ ከለቀሙዕነ ብሬን እህን ቴሱ ጎፍሜ ዘማኔን ክዕኔተኔሃ ለልዮኡ።

21 አመዕነቴክዕኔለከ ተብሶክዕኔ መገኖን እክ መሲህ መሳን እሱ ሬሆች ኬሾሰለከ ኬዕምኝ ኣሴ መገኖን አመዕነንቴነንተ።

22 አመዕናኖተ አጉጣቀንሱ ዮበእ ኢተት ሄኣህዕኔተ ህንቂሃ አዘዘንቴን ነብሳክዕኔ ነጠ አቴንታኣ፤ ህካን እኮቤቹሃ ዊመ * ቀልቢንከክዕኔ መት-መቲንከክዕኔ ጠረኝቴን ኢተቀሜ።

23 ለንኪሃ እለንቴንታሁ ሄአኖለከ ዘላለሚሃ ኡር ሄአኖ መገን ላጋን በእበ ዘሬቹት ቤሉ በኣ ዘሬቹበኣ።

24 መሰንትሰ

«መኑ ጉዕሙንኩ ህጤገ፤

ኬዕምኙሰ ጉዕሙንኩ ቦብሎጋት፤

ህጥት ሞልታኣ፤ ቦብሎንት ግግልታኣ፤

25 ጠዉ እኮጎሬ ቀርቕ ላገት

ዘላለሚሃ ጠረኚት ሄኣኣ»

ዱዱብሰንቶህዕኔ ተሽት ላገት ተኒት።

2

ሄአኖ ክኑለከ ጠሊለ ኡመት

1 ቴሱ ሾክመተ ጉዕመንከ፥ ጣንሱ ጉዕመንከ፥ ተሰቄነጡ፥ አቄሽተለከ ሄምተ ጉዕመንከ ክዕኔች ቁርሰዬ።

2 ሃዕር እለንቶ ሰብያኑት አዙተ ሃዕላታህንገን አዕኑሁ ጡምቶኖተ ነጽቴነን መርቴነንተ ነጠ ትምርት ሃዕላቹ።

3 መሰንትሰ ሃዕላቶኖተ አታልቴነንታንኩ «ጠለዕል ቀርቹ ጎደበ ላፈ እሁሰ ደጌነንተራት።»

4 ህካን እኮቤቹሃ ሄአኖ ክኑ እኮ ቀርቕ ኢሰቤቹ ሆንጠኬ፤ ሁኩ ክኑ መኑ ህንቅ አጉሮሰ ጠዉ እኮጎሬ መገንህኔን ደዕርዮሰህለከ ከበጀሞ ዋጉ ዮሰሃን።

* 1:22 ዊመ፡- የኖሁ መት-መቱ ሉህ ክታበት «ነጠ» ይታኣ።

1:25 ኢሳ. 40፡6-8።

2:3 መዝ. 34፡8።

5 ቀርቾሃ ኢስቤቹ ሆንጠኬንነታሁ ሄእኖ ክንገ እኬን መኪኒት፤ ከን ሃሌን መሲህ ኢስ መሳን ተሽ የኖ ክትመ መገኒሃ ሆንጠህሶኖተ ጠሊላኑተ ቂስተ እኬንነተ።

6 ጠሊሊ መጻፋን

«ሁኩንን ዶዕሬመሰለከ ከበጀሞ

መረበ ቡዕል ክኑ ጽዮኖን አፋሻሞ፤

እሶን አመዕነኖሁ ሆኖን መለኖበእ»

ይታ ላገት ከተበንት ደገንታእ።

7 ቴሱ ክዕኔሃ አመዕንቴንተሁኑሉሃ ሁኩ ክኑ ኬዕሞኙ ዮሰሃን፤ ጠዉ እኩጎሬ አመዕንትቡሁኑሉሃ

«ግንበኛኑት ህንቅ ኡጅቶ ክኑ

እስ መረበ ቡዕል ክኑ እኩ።»*

8 ህትን

«መኒሃ ጉፍቹ እሀኖ ክኑ

መኑ ቆዕል ኡበኖገ አእኖ ክኑ» የኖ።

እስ ላገስ አመዕኑ ሆጎቤቹሃ ቆዕልታእ። ሄጭትን ከኒሃ መጠረንቶእራን።

9 ጠዉ እኩጎሬ አዕኑ ቱንሰቺቹ አጀብሲሰኖ ኑሪህሰ ገኤህዕኔ መገኒሃ አጀብሲሰ ሆጉተ አዋጅቶኖተ መጠረንቴንተ ክልቀት፤ ዋመ ቂስተለከ መገኑ ገይሰሃ አዕዮ ጠሊሊ ኡመት።

10 አዕኑ ወዕና መገንየ ኡመትበእ እቅ፤ እኩጎሬ ቴሱ መገንየ ኡመት፤ ወዕና ማርቱተ ደእቴንበረ እቅ፤ ቴሱ ማርቱተ ደእቴንታእ።

መገን ካዲመተ

11 ኢጃላ! አዕኑ ከን ኣዱንያ አሌን ኮሀለከ መን ባዱ አሜቴንታሃ እኬንተቤቹሃ ነብሴንከክዕኔ ኦለመኖ ማል ሄዕላቻቹ አገዕርቶኖተ ኡጫንክዕኔ።

12 ሂለ ጠወ አቴንነተ ይት ሄዕሞቶህዕኔጎሬ መገኑ ኔሳሃ ዳንዶተ አሜተኖ በር አመዕንትቡ መኑ ጡመ ሆጉክዕኔ ለእ መገኑ ገለትጭቶተ እስ በላን ሄኤንን ጡሙ ሃሉ ሄኤንክዕኔ።

13 ቀርቾሃ ኢስተኔሃ ይቴን ሹምነቱ ዮሰ መኒሃ ጉዕሚንከ አዘዘሜ፤ ጉዕመንከ መኒሃ ሀለቀተ እኩቤቹሃ ዋመ ዋሚሃ አዘዘሜ።

2:6 ኢሳ. 28፥16። * 2:7 መረበ ቡዕል ክኑ፡- የኖሁ ሞኒ እጃሬንን ኡርሴኖ ቱቅገ ሞኒ እጃኖሃን። 2:7 መዝ. 118፥22። 2:8 ኢሳ. 8፥14-15። 2:9 ፋል. 19፥5-6፤ ኢሳ. 43፥20-21፤ ዘዳ. 4፥20፤ 7፥6፤ 14፥2፤ ቲቶ 2፥14፤ ኢሳ. 9፥2። 2:10 ሆሴ. 2፥23።

14 ባዱ ገሽታህኡተ አዘዘሜ፤ እሰ ሂላ አታ መነ ቀጠኦተለከ
ጡመ አታረ ገለትጭቶተ ዋመ ዋሚች ሶህንቶአራን።

15 መሰንትሰ ጡመ ጠወ አቲነን ገዉ መኑ ጠወእ ጠወ ጨለ
ይታገ አቶኖተ መገንተ ሃሽአቱ።

16 መገን ካድመገ እኬን ሰዋልድማን ሄዕዬ ቤሉ
ሰዋልድመክዕኔ ሂላ ጠወ ድቤነንታሃ አቶኖቹ።

17 መነ ጉዕመንከ ከበጅዬ፤ አመዕናኑተ ኢትዬ፤ መገኑ ዋጅዬ፤
ዋመ ከበጅዬ።

መሲህ ኦርሽ ሞሳሌተኔሃ

18 አዕኑ ካዲመት ቀርቻኖተክዕኔ ከበጃን ጠገሜ፤
አዘዘንቲነንታህ ጡማኖተለከ ጎደበ ላፋኖተ ጠለዕል እሳሃ እሁዕነ
ሂላኖተ አዘዘሜ።

19 መንቹ ገለትጨመኖሁ ኢሬን ኦርሸተ ቶገኖረ መገንተኔሃ ይ
ፈረሀኖራት።

20 ሂላ ጠወ አቲነ ህከን ጠውተኔሃ ቅጣት ቶገን ፈረኬንተጎሬ
ሞ ገለቱ ዮህዕኔ? ጠዉ እኮጎሬ ጡመ ጠወ አቲነ ህከን ጠውተኔሃ
ኦሪሸተ ቶገን ፈረኬንተጎሬ መገኒች ገለት ደእቲነንተ።

21 ገእንቲነንታህ ከኒሃት፤ መሰንትሰ እሰ ዋቃሃ አዋንቶኖተ መሲህ
ክዕኔተኔሃ ኦሪሸተ ቶገን ሞሳልተ እኮህዕኔ።

22 እሰ ሆሮ ጩብ አዕዮበእ፤ አፎንከሰ ክዘብ ላገት ደገንቶበእ።

23 ቦሮመሰ ወክት ፈንቀሽ ቦሮሮበእ፤ ኦሪሸተ ቶጎ ወክት ፈየ
ፈረደኖ መገኒሃ ገዉሰ ህግሽ ኣሴ ቤሉ ፎከሮበእ።

24 ነኡ ሬሆን አደ እህ ጌሰ ጩቢች አደ እንክ ፈይማን ሄዕኖተ
እሰ ገዉንኩሰ ጩብኔ ማሊንከሰ መሰቀል አሌን እጃእ፤ እሰ ጡሌን
አዕኑ ፈይቲነንታኦ።

25 አዕኑ በኦ ሆለገ ጀል ጀል ይቲነንታት እቅ፤ እኮጎሬ ቲሱ
ነብሳክዕኔ አገረኖ ዜማንች አደ ፈንቀልቲነንታኦ።

3

ምኒ አንለከ ምኒ አመተኔሃ

1 ህትን ምኒ አማኖ! ምኒ አኖኖተ አዘዘሜ፤ ከን ሃሌን መት-
መቱ መገን ላጋን አመዕንትበረ እኮጎሬ ምንሰ አማኖት መቱርቹሃ
ጠወኡዕናን ጠለዕል ምንሰ አማኖ ሃሊን አመዕንቶተ አታልታኦ።

2 ክዕኔቤቹ አሜቶተ አታልታኢሁ ሙጨሩ እኮለከ መነ ከበጃኖሃ እሁክዕኔ ለአራት።

3 ክዕኔ ደኑክዕኔ ሹሩበ ደዲን፥ ዋርቂን ሹልምሲንለከ ጤአተ ሀዕሬን ኑደኤኖ ኑድኑተ ኑደኢን አብሌን ለኤኖ ሹልሚን እሁንከ።

4 ጠዉ እኮጎሬ ደኑክዕኔ መገን ብሬን ዋጉስ አበ ከበጀሞለከ በእበ ሹልሚን ጎደበ ላፍማንለከ ገዉ አገዕሪን ቀልቤን ኬዕምሰሞለከ በእቡ መክሲን ገዉ ሆፍሲንለከ አታዕሊን ሰውቲን አዛ ጅሰሚን እሁን።

5 መሰንትሰ ብሬ ዘማን መገኑ ተብሳ አታ ጠለላኑ ሚንቱ መክጨንቶኢሁ ህትዬት እቅ፤ እሰን ምንሰ አናኖ ትዛዝ ቶጋ እቅ።

6 አዘዘንቶኢንኩ ሳረ እብራሂሚሃ «ኢ ቀርቸ» ይተን አዘዘንቶሰ ደኒንት፤ አዕኑ ጡመ ጠወ አቴነንተረለከ መቱ ዋጅሲሰኖ ጠዉ ህልቀሰባህዕኔጎሬ እሴተ አለ።

7 ህትን ምኒ አናኖ! ምኒክዕኔ አማኖን ሚጡብ አጥራመቲን ሄዕዬ፤ ክዕኔቶ በትሰ ላፈ ክልቀት እኮቤቺሃለከ ክዕኔን ሚጡብ ሄእ አሰቱተ ረገኣቤቺሃ ኬዕምሼሰ፤ ከን ሃሌን ዱእሃክዕኔ ጉፍቹ እሀኖርቹ ሄአኖበአ።

ጡመ አኢን ኦሪሸተ ቶጉ

8 ጉዕሙንኩክዕኔ መት-መቲንከክዕኔ ኢታን ሄዕዬ፤ ዋሎ መን ኦሪሸተ ገይክዕኔሀንገ አቴን ሰውይዬ፤ አመኦሶገ እኬን ኢተቀሚ፤ ጎደበ ላፋኑተለከ ገዉክዕኔ ሆፍሴነንተረ እኬ።

9 ህትን ማሰዕዬ ቤሉ ሂለርቹ ሂለርቹንለከ ቦርሩ ቦርሪን ፈንቀሽቶኖቹ፤ መሰንትሰ አዕኑ ገእንቴንታሁ ህካን አቶኖታት፤ ህካን አእንከክዕኔ በረከተ ረገኤነንተ።

10 ጠሊሊ መጻፋን

«ሙንዲኖን ዊሞ ሄኡ ሄኦተ ኢተኖሁለከ ጡመ በር ለኦተ ሀሰኖሁ አረብሰ ሂለ ጠወ ጠወኢቶ አፎሰ ሂለ ተንኩተ ጠወኢቶ ገዉሰ አገዕሩን።

11 ህትን ሂለ ጠወ አኢቶ ገዉሰ አገዕሩን፤ ጡመ ጠወ አኡን፤

ህትን ወገሬት ሀሱን፤ ወገሬትንከ አዎኑን፤

12 መሰንትሰ ቀርቶ አልት

ጠለላኑተ ለኣእ፤

መጨንትሰ ዱአሰ ሞጮጮቶተ ፈንተኦእታን፤

ጠዉ እኮጎሬ ሂለ ጠወ አታ መን አሊን

ቀርቼ ኡሙዕሬ ሚኒተ ለሊሰኖ» የመሞኡ።

13 ጡመርቹ አቶኖተ ሃሽኤንተጎሬ ሞዕረተ ኢልሰኖህዕኔሁ አዩት?

14 ጠዉ እኮጎሬ ጡመ ጠወ አቴን ኦርሸተ ቶጌንተጎሬ በረከተ ደእቴነንተ፤ መን ፎከረተ ዋጅቶኖቹ፤ ጨነቀንቶኖቹ።

15 ቀርቼ መሲህ ቀልቤንከክዕኔ ከበጅዬስ፤ ሂእሃክዕኔ ቀርቼ አዕዬስ፤ ክዕኔን ዮ ተብሴሃ ጠዕመኖህዕኔህኒሃ ጉዕሚንከ መሰለ አቶኖተ ጉዕመ ወክት ተቃጠቤ።

16 ጠዉ እኮጎሬ መሰሉክዕኔ ጎደበ ላፍማንለከ ከበጃን እሁን፤ መሲህሃ እኬንተቤቺሃ ዮህዕኔ ጡመ ሃል አሌን ሂለርቹ ጠወኣ መኑ ሂለ ጠወኢንከሰ ሙልቶተ ጡሙ ሰዉቱ ሂኤንክዕኔ።

17 መገኑ ዩጎሬ አዕኑ ሂለ ጠወ አቴን ኦርሸተ ቶጌንተህኒቶ ጡመ ጠወ አቴን ኦርሸተ ቶጉ ቆህኖ።

18 መሲህ ገዉሰ መገን ቤቹ ሆንጠህሶህዕኔተ እሰ ፈየ እህን ፈየ እንኮምበእ ኒ ጨብ መሳን መንተኔሃ ሜጦረን ሬዮኡ፤ እሰ ማለን ሬይ አያኒን ሂእኖሃ እኮ።

19 ህከን አያኒን ኡሱር ሞኔን ዮ ነፍሴቤቹ መር ተሸት ለገተ ዱዱብሴሰ።

20 ሁኩ ኡሱር ሞኔን ዮ ነብሴቤቹ ሂጭ ኑህ ዘማን መርከቡ ቅጥየን መገኑ አደቢን አገራንሰ ሄዕዮገን ትዛዝ ቶጉ ግቦእራን፤ ህከ መርከብ ኣዝ ኣግ ዊ መሳን ጡምቶእሩ ዋሊንሹሰ ህዜቱሃ መን እቅ።

21 ሁኩ ዉሁ ቴሱ ክዕኔተ ፌሰኖ ጥምቀትተ ሞሳል፤ ኩ ጥምቀቱ ጅሰሚቶ ጡር ከሙ እሁዕነ ሙጨሩ ቀልብ ደኢሃ መገን ቤቹ ሆንጠህሰኖሃ ዱኣ፤ ፌሰኖህዕኔንኩ መሲህ ኢሰ ኬእ መሳኒት።

22 እሰ ሰማ ኦርዕይ መገን መኬን ዮኡ፤ እሲንከ መላይከት፥ ዳኛኑትለከ ዋልቀት ዮሰሩ ጉዕሙንኩ ጠገንቶሰ።

4

ጠሊልማን ሂኤ

1 መሲህ ማለንከሰ ኦርሸተ ቶጎሃ እኮቤቺሃ አዕኑ በገዝ ኦዳተ ቆዕሬ መንገ ከን ሰውቲን ጠረኝቴን ተቃጠቤ፤ ማለንከሰ ኦርሸተ ቶጎ መንቹ ጨብ እኡ አጉርኡ። *

3:12 መዝ. 34፥12-16። 3:14 ማቶ. 5፥10፤ ኢሳ. 8፥12-13። 3:20 ክል. 6፥1—7፥24። * 4:1 ማለንከሰ ኦርሸተ ቶጎ መንቹ ጨብ እኡ አጉርኡ፡- የኖሁ ካን ዋሉ ፍሳረት «መሲህ ማለንከሰ ኦርሸተ ቶጎቤቺሃ ጨቢሃ ዋልቀት ሂኣሰበእገ አዕዮኡ» የኖሃን።

2 ከኒቶ ኤተሮን ፈቆ ኣዲንያ ኣሌን ሄእንከክዕኔ ማል ሂላ ሄዕላቸተ ኣኢን እሁዕነ መገን ሰውት ኣቲነን ሄዕዬ።

3 ኣይሁደ ኣክበሩ ኣታህንገ መጠረቁ ዮበኢ፥ ሂላ ሄዕላቻን፥ ሰከርን፥ ጌሱ ዮበእ ሙንዲኖን፥ ጌሱ ዮበኢሃ ኣጌን ቦሎቸ ከድቕለከ ኮፍየኖ ሸርክተ ኣቲነን ሄኤንተ ዘማኑ እሀኖ።

4 ኣኮጎሬ ቲሱ ከን ጠዋን እኮበእጌሰ እሳን ሜጡበ ፍጭርቅ ዩ ሆጌንተቤቺሃ ናዳእ፤ ህትን ቦሮርታእ።

5 ጠዉ እኮጎሬ ፎሊን ዮሀኑኡንለከ ሬዮ መን ኣሌን ፈረዶተ ቅጥይዮ መሰለ እሲሃ ኣታእ።

6 ከን ሃሌን ጉዕመ መንገን እሰን ማሊንከሰ ሬቶተ ፈረደሞሰ፤ ጠዉ እኮጎሬ ኣያንገከሰ ዘላለሚሃ መገንገ ሄኑተ እንጂሉ ሬቶሀኑኡተ ዱዱብሰሞኡ።

መገን ኣሰቶን ጡመገ ኣታ መንተኔሃ

7 ጉዕማንከ ጠዋሃ ጎፍሞሰ ኢልዮኡ፤ ጠረኝቲን ዱኣ ኣኢሃ ኣታልቲነንተ ተሬገጮ ቀልቡ ሄኡንክዕኔ፤ ህትን ገዉ ኣገዕሪን ሄዕዬ።

8 ኣታት ልግብ ጨብ ማጦተ ኣታልታቤቺሃ ጉዕመርቺቶን በትሽ ገገዉክዕኔ ጠረኝቲን ኢተቀሜ።

9 ህትን ቁንቁቶኑዕናን ገገዉክዕኔ ኮሀ ቶቃቀሜ።

10 ኣደደ እኮ መገን ኣሰቶን ጡመ ሃሊን ገሽቶኖተ ክዕኔቶ መት-መቲሰ ኣሰሞሰ ኣሰቶን ዎሉ ካደሙን።

11 ህካን እኮቤቺሃ ተማርሰኖሁ ኣዪሁ መገን ላገተ ተማርሰኖህንገ ተማርሱን፤ ህትን ካደመኖሁ ኣዪሁ መገኑ ኣሴሰ ዎልቃን ካደሙን፤ ከን ሃሌን መገኑ መሲህ ኢሰ ኣዲን ጉዕማንከ ጠዋን ሎዕረኖ፤ ኬዕምኑለከ ዎልቀት ዘላለሚሃ እሲሃ እሁን፤ ኣሚዕን!

ኦርሽ ወክቲን ጠረኝተኔሃ

12 ኢ ጃላ! ጌረገ ፌተንታህዕኔ ኦርሽ ኣዜን እኬንተ ወክት ርሰሞበእ ሃዕሮ ጠዉ ኣሌንከክዕኔ ኢሌህንገ ኣቲን ኣጀብሲጭቶኖቺ።

13 ጠዉ እኮጎሬ መሲህ ኬዕምኑ ለለኖ ወክት ኣበ ሙንደኦኖተ እሰ ኦርሸተ ቤቀንቲነንተረ እኬንተቤቺሃ ተሽ ዩንክዕኔ።

14 ህትን መሲህ ሱዕምተኔሃ ቦሮረንቲነንተጎሬ ኬዕምኝ ኣያን እኮ መገን ኣያኑ ክዕኔ ኣሌን ፎሎጨኖቤቺሃ ማሰኣንቲነንተኣረ።

15 ጠዉ እኮጎሬ ክዕኔቶ ኣዪሁ ኦርሸተ ቶገን ነብሳ ሺህንገ፥ ሞጋንቶገ፥ ተንኩተ ኣኣኖ መንቶገለከ መን ጠዋን ገኑኑዕናንሰ ኣገኖ መንቶገ እሁንከ።

16 እመዕናንቹ እኮቤቹሃ ኦርሸተ ኢልታሲሁ ሄዕዮ ጎሬ እመዕናንቹ የመሞ ገእሞንከሰ መገኑ ገለትጩን ቤሉ ሙሉንከ።

17 መሰንትሰ ፍርዱ ጀመረኖ ወክቱ ሆንጠኮኡ፤ ጀመረኖንኩ መገን መን አሌኒት፤ ህከረ ፍርዱሰ ጀመረኖሁ ኒ አሌን እሀኖረ መገኒሃ እንጂሊሃ አዘዘንታበእ መኒች ኤተሩሰ መ እሀኖ?

18 ጠሊሉ መጸፋ
«ፈዩ መንቹ ጡመኖሁ አበ ጭንቃን እሀኖሃ እኮች

መገኒሃ ጠገንትበሩለከ ጩበኛኑት ሀት እካእ?» የኖ።

19 ህካን እኮቤቹሃ መገን ሰውቲን ኦርሸተ ቶጋ መኑ ገዉሰ እመዕነሞ ካሊቂሃ ኤገተ ኣቱን፤ ጡመ ጠወ አኡ አጉርቱንከ።

5

መገን ኡመት ገሺታ መኒሃ ኣሰንቶ ሸዘነተኔሃ

1 ቲሱ አን እሳንን ሜጡበ መገን እመዕናኖ ዱእ ሞናተ ባልቅ እኮሚሁ፥ መሲህ ኦሪሸተኔሃ ምሰክር እኮሚሁ፥ ከ ኤተሩ ለለኖ ኬዕምኝ ቤቀማም እኮሚሁ በላንከክዕኔ ዮ መገን እመዕናኖ ዱእ ሞነ ባልቀተ ሸዛንሰ።

2 ኤገተ ኣሴመህዕኔ መገን ዜሞህ አገሬ፤ ዜሞሰ አገርቲነንታንኩ ዋልቃን እሁዕነ መገኑ ሀሰኖ ሃሊን ኢታን እሁን፤ ህትን ብረ ኢቲን እሁዕነ ሀዕልቶናተ ዮህዕኔ ሃሸኣቶን እሁን።

3 ህትን ክዕኔ ሹሞነት ኣዜን ዮ መነ ጭንፍቲን ጠቅቶናተ እሁዕነ ዜሜሃሰ ጡመ ምሳልተ ለሊሲን እሁን።

4 ህካን አቲንተጎሬ ሀንገፋ ዜማንቹ አሜተኖ ወክት በእቡ ኬዕምኝ አክሊለ ደእቲነንተ።

5 ህትን እዕኑ ዋደለት ባልቂሃ አዘዘሚ፤ ጉዕሙንኩክዕኔ ገው ሙግ እኡ ኦድኖገ ኦደኤን መቱ ዋሉሰ ካደሙን፤

«መገኑ ቦነኖ መነ ግበኖ፤

እኮጎሬ ገዉሰ ሙግ አታ መኒሃ ኣሰቱሰ ኣሰኖ» የመሞ ከተበሞኡ።

6 ቲሱ መገኑ ዩ ወክቲን ጎት ጎት እኣህዕኔተ መገን ዋልቃሜ አንጋች ዋርን ገዉክዕኔ ሙግ ሙግ አዕዬ።

7 ህትን መገኑ ክዕኔተኔሃ ሰውየኖቤቹሃ ሻዝሰኖህዕኔርቹ ጉዕመንከ እሰ አሌን ኡጅዬ።

8 ህትን ጌሲን ሄዕዬ፤ በቅይዬሁ፤ ዲኑክዕኔ እልቢሱ አጉዕመኖሃ ሀሰን ዋደኖ ዞቤገ ዘሀኖት።

⁹ ከን አዲንያ አሌን ጉዕማንን የ አመዕናኑት አመክሰኔ አሱት ህትኔ ኦሪሸተ ቶጋኢሃ እሁሰ ደገን አመዕነቲን ጠረኝቲን እልቢሰ ግቤሰ።

¹⁰ ቀዋ ወክቲሃ ኦርሸተ ቶጌነታች ኤተሮን መሲህ አዲን ዘላለሚሃ ኬዕምኝቤቹ ገኤህዕኔ ጉዕመ አሰቶ መገኑ ገዉንኩሰ ዊማኑተ አአኖህዕኔ፤ ድክሰኖህዕኔ፤ ጠረኝሰኖህዕኔ፤ ኤርሰኖህዕኔ።

¹¹ ዘላለሚሃ ኢላ ዋልቀት እሲሃ እኩን! አሚዕን።

ኤተር ወገሬት

¹² አመዕነሞ አመኤቤቱ ይ ሰውያም ሰላሴ አዲን ከ ሶህኑተ ገበንቸን ከተቦንክዕኔ፤ ከተቦንክዕኔንኩ ሸዞህዕኔተለክ ኩን ሀንቅ መገን አሰቱት እሁሰ መሰከሮህዕኔተ ይዪት፤ ህካን እኮቤቹሃ ከን መገን አሰቶን ጠረኝቲን ኡሪዬ።

¹³ ክዕኔገን መጠረንቶ ባብሎን ከተንቸን ሄኣ መገን አመዕናኖ ዱእ ሞኒቹት ወገሬት ሆንጠህሳህዕኔት፤ ቤቱእ ማርቆሲሁ «ወገሬት የንተንዶ?» የኖህዕኔት።

¹⁴ አመዕናኖ አተ ሱንቃቀንሺን መት-መቱክዕኔ ዝያዕረሜ፤ መሲህረ እኬንተሀኑኡ ጉዕሚንከክዕኔ ወገሬቱ እሁን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d